

五

倫

書

五倫書卷之二十五

虞伯禹陳謨於帝舜曰安汝止惟幾惟康其弼  
直惟動不應僂志以昭受上帝天其申命用  
休

臯陶陳謨曰允迪厥德謨明弼諧又曰慎厥  
身脩思永惇叙九族庶明勵翼邇可遠在茲

伯益告舜曰。吁。戒哉。儆戒無虞。罔失法度。罔遊于逸。罔淫于樂。任賢勿貳。去邪勿疑。疑謀勿成。百志惟熙。罔違道以干百姓之譽。罔拂百姓以從己之欲。無怠無荒。四夷來王。

商伊尹訓于太甲曰。脩厥身。允德協于下。惟明后。又曰。德惟治。否德亂。與治同道罔不興。與亂同事罔不亡。終始慎厥與。惟明明后。傳說為相。告高宗曰。惟木從繩則正。后從諫則聖。后克聖。臣不命其承。疇敢不祗若王之

休命。又曰。惟厥攸居。政事惟醇。黷于祭祀。時  
謂弗欽。禮煩則亂。事神則難。又曰。非知之艱。  
行之惟艱。王忱不艱。允協于先王。成德惟說。  
不言有厥咎。

周周公旦相成王。作無逸之書。以訓之。曰。嗚呼。  
君子所其無逸。先知稼穡之艱難。乃逸。則知  
小人之依。又曰。無淫于觀。于逸。于游。于田。以  
萬民惟正之供。無皇曰。今日耽樂。乃非民攸  
訓。非天攸若。又曰。嗚呼。我聞曰。古之人猶胥

訓告胥保惠。胥教誨。民無或胥。講張為幻。○  
以王未知稼穡之艱難。乃作七月之詩。陳后  
稷公劉風化之所由。使瞽矇朝夕諷誦以教  
之。○又作文王。大明。緜三詩以戒王文王之  
詩。則述文王之德。明周家所以受命而代商  
者。皆由於此。大明之詩。將陳文武受命。先言  
在下者有明明之德。則在上者有赫赫之命。  
達于上下。去就無常。使知天之所以難忱。而  
為君之所以不易也。緜之詩。追述大王始遷。

岐周以開王業。而文王因之以受天命也。

召公奭為太保。因西旅獻獒。作書訓于武王。有曰。不役耳目。百度惟貞。玩人喪德。玩物喪志。又曰。不作無益。害有益。功乃成。不貴異物。賤用物。民乃足。犬馬非其土性。不畜。珍禽奇獸不育于國。不寶遠物。則遠人格。所寶惟賢。則迓人安。嗚呼。夙夜罔或不勤。不矜細行。終累大德。為山九仞。功虧一簣。允迪茲生。民保厥居。惟乃世王。○成王將蒞政。公以為當戒。

以民事。故詠公劉之事作詩以告之。曰公劉。  
又從王遊於卷阿之上。因王之歌而作詩以  
為戒。曰卷阿。

漢陳平初見漢王。王與語而說之。拜護軍中尉。  
楚急攻絕漢甬道。圍漢王於滎陽城。漢王患  
之。平曰。項王為人恭敬愛人。士之廉節好禮  
者多歸之。至於行功賞爵邑。重之。士亦以此不  
附。今大王慢而少禮。士廉節者不來。然大王  
能饒人以爵邑。士之頑鈍嗜利無恥者亦多。

歸漢。誠各去其兩短。集其兩長。天下指麾即定矣。漢王然之。

陸賈為太中大夫。時時前說稱詩書。高帝罵之曰。乃公居馬上得之。安事詩書。賈曰。馬上得之。寧可以馬上治之乎。且文武並用。長久之術也。鄉使秦已并天下。行仁義。法先聖。陛下安得而有之。帝曰。試為我著秦所以失天下。吾所以得之者。及古成敗之國。賈凡著十二篇。每奏一篇。帝未嘗不稱善。誦其書曰。新



語

魏相宣帝時為相。言於帝曰。明王謹乎尊天。慎于養人。動靜以道。奉順陰陽。則日月光明。風雨時節。寒暑調和。三者得叙。則災害不生。五穀熟。絲麻遂。草木茂。禽獸蕃。民不夭疾。衣食有餘。若是。則君尊民說。上下止怨。政教不違。禮讓可興。

蕭望之宣帝時為大行丞。地節三年夏。京師雨雹。望之上疏言曰。陛下以聖德居位。思政

求賢堯舜之用心也。然而善祥未臻。陰陽不和。是大臣任政。一姓擅執之所致也。附枝大者賊本心。私家盛者公室危。唯明主躬萬機。選同姓舉賢材。以為腹心。與參政謀。令公卿大臣朝見奏事。明陳其職。以考功能。如是則庶事理。公道立。茲邪塞。私權廢矣。對奏。天子拜為謁者。

陳寵為尚書。章帝初即位。承永平故事。政尚嚴切。寵上疏曰。臣聞先王之政。賞不僭。刑不

濫與其不得已。寧僭無濫。往者斷獄嚴明。所以威懲奸慝。奸慝既平。必宜濟之以寬。夫為政猶張琴瑟。大絃急者小絃絕。陛下宜隆先王之道。除滌煩苛之法。輕薄捶楚。以濟羣生。全廣至德。以奉天心。帝深納寵言。每事務於寬厚。

唐孫伏伽補萬年縣法曹。武德初上言三事。其一曰。天子有爭臣。雖無道不失其天下。隋失天下者何。不聞其過也。方自謂功德盛五帝。

邁三王窮侈極欲使天下士肝腦塗地戶口殫耗盜賊日滋而卒不開悟者君不受諫而臣不敢告之也向使開不諱之路官賢授能賞罰時當人人樂業誰能搖亂者乎其二曰百戲散樂本非正聲隋末始見崇用此謂淫風不得不變近太常假民裙襦五百稱以衣妓工游戲臣以為非詔子孫之謀請並廢之以復雅正其三曰性相近習相遠今皇太子諸王左右不可不擇大抵不義無賴及馳騁

射獵歌舞聲色慢游之人。止可悅耳目。備驅馳。至拾遺補過。決不能也。願選賢才。澄僚友之選。高祖大悅。即下詔厚賜其帛。以示羣臣。太宗時。遷大理少卿。帝數出馳射。伏伽諫曰。臣聞天子之居。禁衛九重。出也警。入也蹕。非直尊其居處。為社稷生人計也。比聞陛下走馬射帖。娛悅羣臣。殆非所以導養聖躬。垂憲後代。此直少年諸王務耳。安得既為天子尚行之乎。竊為陛下不取。帝悅曰。卿能言朕失。

朕能改之。天下庶有瘳乎。

魏徵太宗時為太子太師。上嘗問侍臣曰。或君亂而臣治。或君治而臣亂。孰愈。徵對曰。君治則善。惡明賞罰。當臣安得而亂之。苟為不治。縱暴懷諫。雖有良臣。將安所施。上曰。齊文宣得楊遵彥。非君亂而臣治乎。對曰。彼纔能救亡耳。烏足為治哉。

張玄素太宗即位。問以政。對曰。自古未有如隋亂者。得非君自專。法日亂乎。且萬乘之尊。

身決庶務日斷十事五不中中者信善有如  
不中者何若上賢右能使百司善職則高居  
深拱疇敢犯之以陛下聖神跡所以危鑒所  
以亡日慎一日雖堯舜何以加帝曰善拜侍  
御史遷給事中

杜正倫遷給事中知起居注太宗嘗謂侍臣  
曰朕每日坐朝欲出一言即思於百姓有利  
益否正倫曰君舉必書言存於左右史臣職  
當脩起居注不敢不盡愚直若一言乖於道

理千載累於聖德。非直當今損於百姓。帝悅。  
令狐德棻為太常卿。高宗嘗召問何脩而王  
何若而霸。又當孰先。德棻對曰。王任德。霸任  
刑。夏殷周純用德而王。秦專刑而霸。至漢雜  
用之。魏晉以降。王霸兩失。若用之。王為先。帝問  
何為要。對曰。古者為政。清心簡事為本。今天  
下無虞。年穀豐衍。惟薄賦斂。省征役為要。又  
問禹湯桀紂所以興亡。對曰。禹湯罪己其興  
也勃然。桀紂罪人其亡也忽然。帝悅。



宋璟。玄宗時拜吏部尚書兼侍中。會日食。帝素服。侯變錄囚多所貸遣。賑卹災患。罷不急之務。璟曰。陛下降德音。卹人隱。末宥輕繫。惟流死不免。此古所以慎赦也。恐議者直以月蝕脩刑。日蝕脩德。或言分野之變。莫有揣合。臣以謂君子道長。小人道銷。止女謁。放讒夫。此所謂脩德也。囹圄不擾。兵甲不瀆。官不苛治。軍不輕進。此所謂脩刑也。陛下常以為念。雖有虧食。將轉而為福。又何患乎。且君子恥

言浮於行。願動天以誠。無事空文。帝嘉納之。  
張九齡為中書令。開元二十四年秋八月千  
秋節。羣臣皆獻寶鏡。九齡謂以鏡自照見形  
容。以人自照見吉凶。乃述前世興廢之源為  
書五卷。謂之千秋金鑑錄。上之。玄宗賜書褒  
美。

陸贄為翰林學士。德宗欲改元而術家爭言  
數鍾百六。宜有所變。示天下復始。帝乃議更  
益大號。贄曰。今乘輿播越。大慙未去。此人情

向背天意去就之隙。陛下宜痛自貶勵。不宜益美名以累謙德。古之人君德合於天曰皇。合於地曰帝。合於人曰王。父母天地以養人。治物得其宜者曰天子。皆大名也。三代而上所稱尚其德。至秦乃兼曰皇帝。流及後世。昏僻之君始有聖劉天元之號。故人主重輕不在稱美。視德何如耳。帝從之。

李絳憲宗時由司勳郎中進中書舍人。所言事。帝皆順納。後閱月不賜對。絳謂大臣持祿。

不敢諫。小臣畏罪不敢言。管仲以為害霸最甚。今臣等飽食不言。無履危之患。自為計得矣。顧聖治如何。有詔明日對便殿。帝曰。前世任賢以致治。今無賢可任。何耶。絳曰。天子不以己能蓋人。痛折節下士。則天下賢者乃出。帝曰。卿言得之矣。

韋處厚穆宗時為翰林侍講學士。與路隋合易書詩春秋禮孝經論語掇其粹要。題為六經法言二十篇上之。冀助省覽。帝稱善。

柳公權文宗時常對便殿。帝稱漢文帝恭儉。因舉袂曰。此三澣矣。學士皆賀。獨公權無言。帝問之。公權對曰。人主當進賢退不肖。納諫諍。明賞罰。服澣濯之衣。此小節耳。非有益治道者。帝徐曰。卿有諍臣風。可屈居諫議大夫。乃自舍人下遷。仍為學士知制誥。

裴度復輔政。敬宗嘗日晏坐朝。度諫曰。比陛下月率六七臨朝。天下人知勤政。河朔賊臣皆悚畏。近開延英益稀。恐萬機奏稟有所壅

關夫順養之道當順適時候則六氣平和萬壽可保今方居盛夏宜詰旦數坐廣加延問漏及巳午則炎赫可畏聖躬勞矣帝嘉納為數視朝

令狐綯為翰林學士宣宗嘗夜召綯與論人間疾苦帝出金鏡書曰太宗所著也卿為我舉其要綯摘語對曰至治未嘗任不肖至亂未嘗任賢任賢享天下之福任不肖罹天下之禍帝曰善朕讀此嘗三復乃已綯再拜曰

陛下必興王業。捨此孰先。

宋蘇易簡任中書舍人。充承旨。嘗直禁中。以水試歌器。太宗密聞之。因晚朝問曰。卿所玩得非歌器耶。易簡曰。然。命取試之。易簡進曰。臣聞日中則昃。月滿則虧。器盈則覆。物盛則衰。願陛下持盈守成。慎終如始。以固大業。則天下幸甚。

呂蒙正。太宗時。以吏部尚書入相。帝嘗因對論及征伐。蒙正對曰。治國要在內脩政事。

則遠人來歸。自致安靜。帝肄之嘗燈夕設宴。  
蒙正侍。帝語之曰。五代之際。生靈凋喪。當時  
謂無復太平之日矣。朕躬覽庶政。萬事粗理。  
每念上天之貺。致此繁盛。乃知理亂在人。蒙  
正避席曰。乘輿所在。士庶走集。故繁盛如此。  
臣嘗見都城外不數里。饑寒而死者甚衆。願  
陛下視近以及遠。蒼生之幸也。

陳恕為三司使。真宗命具中外錢穀大數。以  
聞。恕諾而不進。久之。帝屢趣之。恕終不進。命



執政詰之。怒曰：「天子富於春秋，若知府庫充羨，恐生侈心，是以不敢進。」帝聞而善之。

呂夷簡拜同中書門下平章事。仁宗始親政，事夷簡，手疏陳八事曰：「正朝綱，塞邪徑，禁貨賂，辨佞壬，絕女謁，疎近習，罷力役，節冗費。」其語甚切。夷簡又擢孫奭等居講席，以經義輔導。後又增置崇政殿說書。天章閣侍講之職，以廣帝聞見。

賈昌朝。仁宗詔對過英閣。帝問乾卦。昌朝曰：

乾之上九稱亢龍有悔。悔者凶災之萌。爻在亢極。必有凶災。不言凶而言悔者。以悔有可凶。可吉之義。脩德則免悔而獲吉矣。用九見羣龍無首。吉。聖人用剛健之德。乃可決萬機。天下久盛。柔不可以濟。然亢而過剛。又不能久。獨聖人外以剛健決事。內以謙恭應物。不敢自矜為天下首。乃吉也。帝賜手詔優荅。

呂公著。仁宗時侍經筵。帝嘗詔講官凡經傳所載逆亂事。皆直言毋諱。公著因進講言。弑

逆之事臣子之所不忍言。而仲尼書之春秋者。所以深戒後世人君。欲其防微杜漸。居安慮危。使君臣父子之道素明。長幼嫡庶之分早定。則亂臣賊子無所萌其奸心。故易曰。履霜。堅冰至。由辨之不早。辨也。侍讀劉敞退。謂記言官曰。當載之史冊。以垂後世。神宗時。為端明殿學士。帝從容與論治道。遂及釋老。公著問曰。堯舜知此道乎。帝曰。堯舜豈不知。公著曰。堯舜雖知此。而惟以知人安民為難。所以

為堯舜也。帝又言唐太宗能以權智御臣下。對曰太宗之德以能屈己從諫。帝善其言。哲宗即位復上言曰。人君初即位當正始以示天下。脩德以安百姓。脩德之要莫先於學。學有緝熙于光明則日新以底至治者學之力也。謹昧死陳十事曰。畏天愛民。脩身講學。任賢納諫。薄斂省刑。去奢無逸。又乞備置諫貲以開言路。拜尚書左丞。門下侍郎。龔鼎臣。仁宗時擢起居舍人。同知諫院。歲冬。

五倫書卷二十三  
旱。將錫春宴。鼎臣曰。旱蓄大甚。非君臣同樂之時。請罷宴以荅天戒。日當食。陰雲不見。鼎臣曰。陽精既虧。四方必見。為異益大。願精思力行。進賢遠佞。以應皇極。帝然之。

呂希哲為崇政殿說書。其勸導人主以脩身為本。脩身以正心誠意為主。其言曰。心正意誠。則身脩而天下自化。不假他術。身不能脩。雖左右之人且不能諭。況天下乎。

劉敞判三班院。侍英宗講讀。每指事據經。因

以諷諫。時兩官方有小人間言。諫者或訐而過直。敞進讀史記至堯授舜以天下。拱而言曰。舜至側微也。堯禪之以位。天地享之。百姓戴之。非有他道。惟孝友之德光于上下耳。帝竦體改容。知其以義理諷也。皇太后聞之亦大喜。

韓維。英宗時侍講。迺英帝初免喪。簡默不言。維上疏曰。迺英閣者。陛下燕閒之所也。侍於側者。皆獻納論思之臣。陳於前者。非經則史。

可以博咨訪之義。窮仁義之道。究成敗之原。今禮制終畢。臣下傾耳以聽玉音。陛下之言。此其時也。臣請執筆以俟。

韓琦進封魏國公。英宗得暴疾。太后垂簾聽政。帝疾甚。舉措或改常度。遇左右尤少恩。左右多不悅者。乃共為讒間。兩宮遂成隙。琦見帝。帝曰。太后待我無恩。琦對曰。自古聖帝明王。不為少矣。然獨稱舜為大孝。豈其餘盡不孝耶。父母慈愛而子孝。此常事不足道。惟父

母不慈而子不失孝。乃為可稱。但恐陛下事之未至尔。父母豈有不慈者哉。帝大感悟。

吳奎神宗初為叅知政事。嘗進言曰。陛下在推誠應天。天意無他。合人心而已。若以至誠格物。莫不以至誠應。則和氣之感。自然而致。今民力困極。國用窘乏。必俟順成。乃可及他事。帝王所職。惟在於判正邪。使君子常居要近。小人不得以害之。則自治矣。帝然之。

富弼神宗改元。以鄭國公判汝州。詔入覲。帝



坐語從容。訪以治道。弼知帝果於有為。對曰。人主好惡。不可令人窺測。可測則姦人得以傳會。當如天之監人。善惡皆所自取。然後誅賞隨之。則功罪無不得其實矣。又問邊事。對曰。陛下臨御未久。當布德行惠。願二十年口不言兵。帝默然。至日昃乃退。時有為帝言災異皆天數。非關人事得失所致者。弼聞而歎曰。人君所畏惟天。若不畏天。何事不可為者。此必奸人欲進邪說。以搖上心。使輔弼諫諍。

之臣無所施其力。是治亂之機。不可以不速  
揅。即上書數千言力論之。又言君子小人之  
進退。係王道之消長。願深加辨察。勿以同異  
為喜怒。勿以喜怒為用舍。帝嘉納之。

王安石。神宗時為翰林學士兼侍講。帝問為  
治所先。對曰。擇術為先。帝曰。唐太宗何如。對  
曰。陛下當法堯舜。何以太宗為哉。堯舜之道  
至簡而不煩。至要而不迂。至易而不難。但末  
世學者不能通知。以為高不可及爾。帝曰。卿

可謂責難於君。朕自視眇躬。恐無以副卿此意。可悉意輔朕。同濟此道。

蘇軾直史館。神宗召見。問方今政令得失安在。對曰。陛下生知之性。天縱文武。不患不明。不患不勤。不患不斷。但患求治太急。聽言太廣。進人太銳。顧鎮以安靜待物之來。然後應之。帝竦然曰。卿三言。朕當熟思之。會上元勅府市浙燈。且令損價。軾疏言。陛下豈以燈為悅。此不過以奉二宮之懽耳。然百姓不可戶

曉。皆謂以耳目不急之玩。奪其口體必用之  
資。此事至小。體則甚大。願追還前命。即詔罷  
之。時王安石創行新法。軾上書論其不便。大  
要以結人心。厚風俗。存紀綱為言。哲宗時為  
翰林學士。兼侍讀。每進讀。至治亂興衰邪正  
得失之際。未嘗不及覆開導。覲有所啓悟。帝  
雖恭默不言。輒首肯之。

司馬光神宗時除御史中丞。上疏論脩心之  
要三。曰仁。曰明。曰武。治國之要三。曰官人。曰

信賞曰必罰。其說甚備。且曰。臣昔為諫官。即以此六言獻仁宗。其後以獻英宗。今以獻陛下。平生力學所得盡在是矣。帝然其言。

劉摯。哲宗即位。擢侍御史。上疏曰。陛下春秋鼎盛。在所資養。願選忠信孝弟。博茂老成之人。以充勸講進讀之任。便殿燕坐。時賜延對。執經誦說。以廣睿知。仰副善繼求治之志。帝然之。

呂大防。拜尚書左僕射兼門下侍郎。見哲宗。

年益壯。日以進學為急。請勅講讀官取仁宗  
通英御書。解釋上之。寘于坐右。又撫乾興以  
來四十一事。足為勸戒者。分上下篇。標曰仁  
祖聖學。使人主有欣慕不足之意。

范祖禹。哲宗時。遷著作郎。兼侍講。夏暑。權罷  
講。祖禹言。陛下今日之學。與不學。係他日治  
亂。如好學。則天下君子。欣慕。願立於朝。以直  
道事陛下。輔佐德業。而致太平。不學。則小人  
皆動其心。務為邪諂。以竊富貴。且凡人之進

學莫不於少時。今聖質日長。數年之後。恐不得如今日之專。竊為陛下惜也。嘗講尚書至內作色荒。外作禽荒六語。拱手再誦。却立云。願陛下留聽。帝首肯再三。乃退。

王巖叟。哲宗時嘗侍迓英講。進讀寶訓至節費。巖叟曰。凡言節用。非偶節一事。便能有濟。當每事以節儉為意。則積久累日。國用自饒。讀仁宗知人事。巖叟曰。人主常欲虛心平意。無所偏係。觀事以理。則事之是非。人之邪正。

自然可見。司馬康講洪範至乂用三德。帝曰止此三德。為更有德。巖叟因言于帝曰。三德者。人君之大本。得之則治。失之則亂。不可須臾去者也。三者足以盡天下之要在陛下力行何如耳。帝然之。

程大昌權禮部侍郎直學士院。孝宗嘗問治道不進。奈何。對曰。陛下勤儉過古帝王。自女真通和。知尊中國。不可謂無效。但當求賢納諫。脩政事。則大有為之業在其中。不必他求。



奇策以幸速成

張栻孝宗時直秘閣奏言先王所以建事立功無不如志者以其胸中之誠有以感格天  
人之心而與之無間也。今規畫雖勞而事功  
不立。陛下誠深察之。日用之間。念慮云為之  
際。亦有私意之發以害吾之誠者乎。有則克  
而去之。使吾中局洞然無所間雜。則見義必  
精。守義必固。而天人之應將不待求而得矣。  
劉珙孝宗時拜中大夫兼參知政事。帝嘗以

久旱齋居禱雨。一夕而應。珙進言曰。陛下誠心感格。其應如響。天人相與之際。真不容髮。隱微纖芥之失。其應豈不亦猶是乎。臣願益謹其獨。帝竦然稱善。

朱熹孝宗時以江西提刑入奏事。言於帝曰。陛下即位二十有七年。而因循荏苒。無尺寸之效。可以仰酬聖志。嘗反覆而思之。無乃燕閒嬖護之中。虛明應物之地。天理有所未純。人欲有所未盡。一念之頃。公私邪正是非得。

失之機。朋分角立。交戰於其中。願陛下自今  
以往。一念之頃。則必謹而察之。果天理也。則  
敬以克之。果人欲也。則敬以克之。推而至於  
言語動作之間。用人處事之際。無不以是裁  
之。則聖心洞然。中外融徹。無一毫之私欲得  
以介乎其間。而天下之事。將惟陛下之所欲  
為。無不如志矣。帝獎諭甚至。

魏了翁為起居郎。理宗即位之明年。雷發非  
時。帝見羣臣有朕心終夕不安之語。了翁入

對。卽論人主之心。義理所安。是之謂天。非此心之外。別有所謂天地神明也。陛下盍卽不安而求之。對天地。事大母。見羣臣。親講讀。皆隨事反求。則大本立而無事不可爲矣。

吳泳。理宗時以著作郎對言。願陛下養心以清明。約已以恭儉。進德以剛毅。發彊母以旨酒。違善言。母以嬖御。嫉莊士。母以靡曼之色。伐天性。杜漸防微。澄源正本。使君身之所自立者。先有其地。夫然後移所留之聰明。以經

世務。移所舍之精神。以彊國政。移所用之心力。以恤罷民。移所當省之浮費。以搞邊上。久戍之士。則不惟可以消弭災變。攘除姦凶。殄滅寇賊。雖以是建久安長治之策可也。

元。竇默隱居教授。世祖在潛邸。遣人召之。既至。問以治道。默首以三綱五常為對。帝曰。人道之端。孰大於此。失此則無以立於世矣。默又言。帝王之道。在誠意正心。心既正。則朝廷遠近莫敢不一於正。一日凡三召與語。奏對皆

稱旨。自是敬待加禮。不令暫去左右。

李孟大德初。仁宗侍母后。降居懷州。孟以布衣每進言曰。堯舜之道。孝弟而已矣。今侍大母居外。當迎奉意旨。以娛樂之。則孝弟之道得矣。帝深納其言。日問安視膳。婉容愉色。有暇則就孟講論古先帝王得失成敗。及君君臣臣父子子之義。孟善論事。忠愛懇惻。言之不厭。而治天下之大經大法。深切明白。帝嘗與羣臣語。握拳示之曰。所重乎儒者爲其

握持綱常如此其固也。其講學之功實益啓之。及為平章政事。嘗言於帝曰。人君之柄在刑賞。賞一善而天下勸。罰一惡而天下懲。所施失當。何以為治。又曰。貴賤有章。所以定民志。賜予有節。所以勸臣下。請各為之限制。帝皆從之。

陳顥初為說書。侍仁宗奉母后出居懷州。日開陳以古聖賢居艱貞之道。帝既即位。拜集賢大學士。榮祿大夫。政事無不與聞。燕閒輒

取聖經所載大經大法有切治體者陳之每  
見嘉納

屢屢為翰林學士承旨順帝即位侍經筵日  
勸帝務學帝輒就之習授凡四書六經所載  
治道為帝紬繹而言必使辭達感動帝衷或  
遇天變民災必憂見於色乘間則進言於帝  
曰天心仁愛人君故以變示儆譬如慈父於  
子愛則教之戒之子能起敬起孝則父怒必  
釋人君側身脩行則天意必回帝察其真誠



虛已以聽

朱公遷順帝時以遺逸徵授翰林直學士。每  
勸帝親賢遠佞。抑豪彊。省冗費。脩德邇民。庶  
天意可回。民志可定。不然。恐國家之憂近在  
旦夕。帝嘉之。

五倫書卷之二十六

虞伯禹作司空言於帝舜曰。洪水滔天。浩浩懷  
山襄陵。下民昏墊。予乘四載。隨山刊木。暨益  
奏庶鮮食。予決九川。距四海。濬畎澮。距川。暨  
稷播奏庶艱食。鮮食。懋遷有無化居。烝民乃  
粒。萬邦作乂。○惟荒度土功。弼成五服。至于

五千州十有二師。外薄四海。咸建五長。各迪  
有功。○德惟善政。政在養民。水。火。金。木。土。  
穀。惟修。正德。利用。厚生。惟和。九功惟叙。九叙  
惟歌。戒之用休。董之用威。勸之以九歌。俾勿  
壞。

周。周公旦相成王位冢宰。初基作新大邑于東  
國洛。大保召公奭先周公相宅。越若來三月  
惟丙午臚。越三日戊申。大保朝至于洛卜宅。  
厥既得卜。則經營。越三日庚戌。大保乃以庶

殷攻位于洛汭。越五日甲寅位成。若翼日乙卯。周公朝至于洛。則達觀于新邑營。越三日丁巳。用牲于郊。牛二。越翼日戊午。乃社于新邑。牛一。羊一。豕一。越七日甲子。周公乃朝用書命庶殷侯甸男邦伯。厥既命殷庶。庶殷丕作。○周公既歸。政成王。作立政以戒于王。欲其專擇百官有司之長。有曰。繼自今我其立政。立事。準人。牧夫。我其克灼知厥若。丕乃俾亂相。我受民和。我庶獄庶慎。時則勿有間之。

○其克詰爾戎兵。以陟禹之迹。方行天下。至于海表。罔有不服。以觀文王之耿光。以揚武王之大烈。○惟王建國。辨方正位。體國經野。設官分職。以為民極。

仲山甫佐宣王中興。王命築城于齊。尹吉甫作烝民之詩以送之。曰。天子是若。明命使賦。績戎祖考。王躬是保。出納王命。王之喉舌。○肅肅王命。仲山甫將之。邦國若否。仲山甫明之。

召穆公虎受宣王命平淮南之夷詩人作江  
漢之詩以美之曰經營四方告成于王四方  
既平王國庶定時靡有爭王心載寧○王命  
召虎來旬來宣文武受命召公維翰無曰予  
小子召公是似肇敏戎公用錫爾祉

列國齊管仲相桓公制國為二十一鄉工商之  
鄉六士鄉十五作內政以寄軍令興鹽筴以  
盡海王之利以三選擇賢始於鄉長之推繼  
於官長之選復親自咨相於是民皆勉於為

善相地而征山澤。各致其時。於是民各安其  
居。正封疆。重聘幣。號召天下之遊士。擇諸侯  
之淫亂者而先征之。反棠潛於魯。使為南伐  
之主。反臺原漆里於衛。使為西伐之主。反柴  
夫吠狗於燕。使為北伐之主。故齊國之境南  
至鉤陰。西至濟北。北至于河。東至紀鄆。革車  
八百乘。即位數年。一戰而帥服者三十一國。  
漢蕭何從沛公至咸陽。諸將皆走金帛財物之  
府分之。何獨先入收秦丞相御史律令圖書。

藏之沛公所以具知天下阨塞戶口多少強弱之處民所疾苦者以何具得秦圖書也項羽立沛公為漢王王怒欲攻之何諫曰雖王漢中之惡不猶愈於死乎夫能誦於一人之下而信於萬乘之上者湯武是也臣願大王王漢中養其民以致賢人收用巴蜀還定三秦天下可圖也王曰善乃就國以何為丞相張良從漢王在滎陽項羽急圍滎陽漢王恐與酈食其謀撓楚權食其欲復立六國後王



曰善趣刻印。未行。良從外來謁漢王。方食。曰。客有爲我計撓楚權者。具以酈生語告良。曰。何如。良曰。誰爲大王畫此計。大王事去矣。臣請藉前箸爲大王籌之。言其不可復立六國之後者有七。且曰。天下游士離親戚棄墳墓去故舊從大王游者。徒欲日夜望咫尺之地。今復立六國。後天下游士各歸事其主。大王誰與取天下乎。漢王輟食吐哺。罵曰。豎儒幾敗乃公事。今趣銷印。

酈食其從漢王擊楚。數困滎陽。成臯王計欲  
捐成臯以東。屯鞏。雒以距楚。食其因曰。臣聞  
之。知天之天者。王事可成。不知天之天者。王  
事不可成。王者以民爲天。而民以食爲天。夫  
敖倉天下轉輸久矣。臣聞其下藏粟甚多。楚  
人拔滎陽。不堅守敖倉。乃引而東。此乃天所  
以資漢。方今楚漢久相持不決。百姓騷動。海  
內搖蕩。農夫釋耒。紅女下機。天下之心未  
有所定也。願今急復進兵。收取滎陽。據敖倉之

栗塞成臯之險。杜太行之道。距飛狐之口。守  
白馬之津。以示諸侯形勝之勢。則天下知所  
歸矣。漢王曰善。

婁敬當高帝初定天下。將都雒陽。進說曰。秦  
地被山帶河。四塞以為固。卒然有急。百萬之  
衆可具。因秦之故資甚美膏腴之地。此謂天  
府。陛下入關而都山東。雖亂。秦故地可全而  
有也。夫與人鬪而不搯其亢。拊其背。未全勝  
也。願陛下都關中。左右大臣皆山東人。多勸

帝都雒陽。張良曰。雒陽雖有小固。其中小田  
地薄。四面受敵。此非用武之國。夫關中左殽  
函。右隴。蜀沃野千里。南有巴蜀之饒。北有胡  
苑之利。阻三面而固守。獨以一面東制諸侯。  
諸侯安定。河渭漕輓天下西給京師。諸侯有  
變。順流而下。足以委輸。此所謂金城千里。天  
府之國。婁敬說是也。於是即日駕西都關中。  
曹參為齊相。惠帝二年。蕭何卒。召參代為相。  
國舉事無所變更。一遵何約束。參子窋為中

大夫帝怪相國不治事。以為豈少朕與。謂密  
婦試私問參。參怒。咎密曰。趣入侍。天下事非  
若所當言也。至朝時。帝讓參。參免冠謝曰。陛  
下自察聖武。孰與高帝。帝曰。朕乃安敢望先  
帝乎。曰。陛下觀臣能孰與蕭何賢。曰。君似不  
及也。參曰。陛下言之是也。且高帝與蕭何定  
天下。法令既明。今陛下垂拱。參等守職。遵而  
勿失。不亦可乎。帝曰。善。君休矣。為相三年。百  
姓歌之曰。蕭何為法。較若畫一。曹參代之。守

而勿失載其清淨民以寧一

周勃為人木強敦厚高帝以為可屬大事事  
惠帝為太尉及諸呂顯兵秉政欲危劉氏勃  
與丞相陳平謀以曲周侯酈商子寄與呂祿  
善使人劫商令寄給祿曰高帝與呂后共定  
天下劉氏所立九王呂氏三王足下不急之  
國守藩乃為上將將兵留此為大臣諸侯所  
疑何不速歸將軍印以兵屬太尉時勃欲入  
北軍不得入襄平侯紀通尚符節乃令持節

矯內勅北軍。復令酈寄典客。劉揭說祿。祿遂解印屬典客。而以兵授勃。勃入軍門。令軍中曰。為呂氏右袒。為劉氏左袒。軍皆左袒。遂將北軍。丞相平召朱虛侯劉章佐勃。共誅諸呂。無少長皆斬之。遂迎代王立之。是為文帝。

霍光受武帝遺詔輔昭帝。及帝崩。光承太后詔迎立昌邑王賀。賀淫亂。不足奉宗廟。子萬姓。光率羣臣奏太后廢之。會大臣議所立。未定。光祿大夫丙吉言於光曰。方今社稷宗廟

羣生之命。在將軍之壹舉。而武帝曾孫名病。  
已在掖庭外家者。今十八九矣。通經術。有美  
材。行安而節和。願將軍詳大義。參以蓍龜。先  
使入侍。今天下昭然知之。然後決定大策。光  
用其言。會丞相以下上奏太后。迎曾孫於掖  
庭而立之。是為孝宣皇帝。

魏相少明易經。有師法。及為丞相。好觀漢故  
事。及便宜章奏。數條漢興以來國家便宜行  
事。及賢臣賈誼。晁錯。董仲舒等所言。請施行



之。勅掾史案事郡國。及休告從家還至府。輒白四方異聞。或有逆賊風雨災變。相輒奏言之。時丙吉為御史大夫。同心輔政。宣帝皆重之。

侯霸初為臨淮大尹。王莽末。霸獨能保全其郡。光武即位。徵拜尚書令。時無故典。朝廷又少舊臣。霸明習故事。收錄遺文。條奏前世善政法度。有益於時者。皆施行之。每春下寬大之詔。奉四時之令。皆霸所建也。

三國蜀諸葛亮治蜀頗尚嚴峻法正謂曰昔高祖入關約法三章而秦民知德願緩刑弛禁以慰此州之望亮曰秦以無道政苛民怨高祖因之可以弘濟劉璋暗弱德政不舉威刑不肅君臣之道漸以陵替寵之以位位極則賤順之以恩恩竭則慢所以致弊今威之以法法行則知恩限之以爵爵加則知榮榮恩並濟上下有節為治之要於斯著矣未幾而

蜀大治

法正說先主曰。曹操一舉而降張魯。定漢中。不因此勢以圖巴蜀。而留夏侯淵張郃屯守。身遽北還。此非其智不逮而力不足也。必將內有憂故耳。今策淵郃才畧不勝國之將帥。舉衆往討。則必可克之。克之日。廣農積穀。觀釁伺隙。上可以傾覆寇敵。尊獎王室。中可以蠶食雜涼。廣拓境土。下可以固守要害。為持久之計。此蓋天以與我。時不可失也。先主善其策。乃率諸將進兵漢中。

晉祖逖為軍諮祭酒。時元帝方拓定江南。未遑北伐。逖進說曰。晉室之亂。由藩王爭權。自相誅滅。遂使戎狄乘隙。毒流中原。今遺黎既被殘酷。人有奮擊之志。誠能發威命將。使若逖等為之統。則郡國豪傑必因風嚮赴。沉溺之士欣於來蘇。庶幾國恥可雪。帝喜。乃以逖為奮威將軍。豫州刺史。給千人廩。布三千匹。不給鎧仗。使自招募。仍將流徙部曲百餘家渡江。逖中流擊楫而誓曰。祖逖不能清中原而

復濟者。有如大江。辭色壯烈。衆皆慨歎。屯于淮陰。起冶鑄兵器。得二千餘人。而後進。

唐傅弈。高祖即位。拜太史丞。時國制草具。多仍隋舊。弈謂承亂世之後。當有變更。乃上言。龍紀火官。黃帝廢之。咸池六英。堯不相沿。禹弗行舜政。周弗嚴湯禮。陛下撥亂反正。而官名律令。一用隋舊。且懲沸羹者。吹冷壺。傷弓之鳥。驚曲木。況天下久苦隋暴。安得不新其耳目哉。改正朔。易服色。變律令。革官名。功極作。

樂治終制禮使民知盛德之隆此其時也然  
官貴簡約夏后官百不如虞氏五十周三百  
不如商之百又曰夏有亂政而作禹刑商有  
亂政而作湯刑周有亂政而作九刑至衛鞅  
為秦制法增鑿顛抽脅鑊烹等六篇始皇為  
挾書律此失於煩不可不監帝善之

杜如晦與房玄齡共筦朝政時天下新定臺  
閣制度憲物容典率二人討裁每議事帝所  
玄齡必曰非如晦莫籌之及如晦卒用玄

三傳書卷之二十一  
十一  
齡策。蓋如晦長於斷。而玄齡善謀。兩人深相知。故能同心濟謀。以佐佑帝。當世語良相。必曰房杜云。

魏徵太宗即位。拜諫議大夫。日益親信。或引至臥內。訪天下事。徵亦自以不世遇。乃展盡底蘊。無所隱。凡三百餘奏。無不剴切。當帝心者。帝嘗曰。朕始即位。惟徵勸我脩文德。安中夏。則遠人服。今天下大安。四夷君長皆來貢。獻此徵力也。又曰。貞觀之後。納忠諫。正朕違。

為國家長利微而已。雖古名臣亦何以加。  
高馮貞觀初拜監察御史累遷中書舍人。列  
上五事以為今天下大定而刑未措者何哉。  
蓋謀猷之臣臺閣之吏不崇簡易而昧經遠。  
故執憲者以深刻為奉公。當官者以侵下為  
益國。如尚書八座人主所責成者也。宜擇溫  
厚脩潔者任之。敦朴素革浮偽使家識慈孝  
人知廉恥。自然禮節興矣。陛下身帥節儉而  
營繕未息。額愛其財無使殫。惜其力無使弊。



畿內數州京師之本。土狹人庶。儲蓄少。科役多。宜蒙優賚。令得休息。強本弱枝之義也。至江南河北。人頗舒閑。宜蒙差等。均量勞逸。公族勲戚之家。邑入俸稍足以奉養。而貸息出舉。爭求什一。下民化之。競為錐刀。宜加懲革。今外官卑品。皆未得祿。故飢寒之切。夷惠不能全其行。為政之道。期於易從。不卹其匱。而欲其廉正。恐巡察歲出。輜軒繼軌。而侵漁不息也。宜及戶口之繁。倉庾之實。稍加廩賜。使

得事父母養妻子。然後督責其效。則官人畢力矣。太宗稱善。

陸贄始入翰林。年尚少。以才幸。在奉天。朝夕進見。小心精潔。未嘗有過。由是帝親倚焉。雖外有宰相主大議。而贄常居中參裁可否。時號內相。嘗為帝言。今盜遍天下。宜痛自咎悔。以感人心。昔成湯罪已。以興。楚昭王出奔。以一言善復國。陛下誠不吝改過。以言謝天下。使臣持筆。亡所忌。庶叛者革心。帝從之。故奉

天所下制書。雖武人悍卒。無不感動流涕。及輔政。不敢自顧重。事有可否。必言之。所言皆剴拂。帝短。慙。到深切。或規其大過者。對曰。吾上不負天子。下不負所學。皇他卹乎。

段秀實為司農卿。嘗以禁兵寡弱。不足以備非常。言於德宗曰。古者天子曰萬乘。諸侯曰千乘。大夫曰百乘。蓋以大制小。以十制一。今外有不庭之虜。內有梗命之臣。而禁兵寡少。卒有患難。何以待之。且猛虎為獸。畏者有爪。

牙也。若去之。則犬彘馬牛皆能為敵。帝不用。  
及涇卒亂。召神策六軍。無一人至者。世多其  
謀。

李德裕進位司徒。會昌間黠戛斯遣使來。且  
言取安西北庭。武宗欲從黠戛斯求其地。德  
裕曰。不可。安西距京師七千里。北庭五千里。  
異時由河西隴右抵玉門關。皆我郡縣。往往  
有兵。故能緩急調發。自河隴入吐蕃。則道出  
回鶻。回鶻今破滅。未知黠戛斯果有其地耶。

假令安西可得。即復置都護。以萬人往戍。何所興發。何道饋餽。彼天德振武於京師近。力猶苦不足。況七千里安西哉。臣以為縱得之。無用也。帝乃止。

李藩拜中書門下平章事。憲宗嘗問前世所以家給或匱乏者。何致而然。藩對曰。儉則足。用。敦本則百姓富。反是則匱。帝悅曰。當與公等上下相勗。以保此言。

宋趙普為相。太祖即位初。數出微行。或過功臣。

家不可測。普每退朝不敢脫衣冠。一日大雪向夜。普謂帝不復出矣。久之。聞叩門聲。普亟出。帝立風雪中。普惶懼迎拜。帝曰。已約晉王矣。已而王至。共於普堂中設重裀地坐。普從容問曰。夜久寒甚。陛下何以出。帝曰。吾睡不能着。一榻之外皆他人家也。故來見卿。普曰。陛下小天下耶。南征北伐。今其時也。願聞成筭所向。帝曰。吾欲下太原。普默然久之曰。非臣所知也。帝問其故。普曰。太原當西北二邊。

使一舉而下。則二邊之患我獨當之。何不姑留以俟。削平諸國。則彈丸黑子之地。將無所逃。帝笑曰。吾意正如此。特試卿耳。遂定下江南之議。

呂端為宰相。時保安軍奏獲李繼遷母。太宗以繼遷擾西鄙。欲誅之。獨召樞密副使寇準與謀。準退。自相幕次前過。不入。端疑謀大事。使人邀準至。問曰。上戒君勿言於端乎。準曰。否。端曰。邊鄙常事。端不必與知。若軍國大計。

端備位宰相。不可不知也。準遂告其故。端曰。何以處之。準曰。欲斬於保安軍北門外以戒凶逆。端曰。必若此。非計之得者也。顧少緩之。端入奏曰。昔項羽得太公欲烹之。高祖曰。願分我一杯羹。夫舉大事。不顧其親。況繼遷悖逆之人乎。陛下今日殺之。明日繼遷可擒乎。若其不然。徒結怨讎。愈堅其叛心耳。帝曰。然則何如。端曰。以臣之愚。宜置於延州。使善養視之。以招來繼遷。雖不能降。終可以繫其心。



而母死生之命在我矣。帝撫髀稱善曰：「微卿幾誤我事。」即用端策。其母後病死延州。繼遷尋亦死。繼遷子竟納款請命。

曾公亮脩起居注。擢待制。仁宗一日召執政侍從策訪政事。時公亮侍。楚國太夫人病。謁告家居。亟以手詔就問。公亮條六事以獻。其畧謂：完堡柵蓄兵馬使主兵者久於其任。則夷狄不敢窺邊。取之得其要。任之盡其材。則將帥不患無人。損冗兵汰冗官。則財用省。徭

役不專在農。則耕者勸。又陳古者六郡良家子為宿衛。及府兵番上十六衛之制。以明今宿衛之失。言狂者似直。愛憎似忠。以明聽言知人之難。蓋皆取當時之所先急而便於施行者。以為說。帝嘉之。

范仲淹除叅知政事。仁宗方銳意太平。開天章閣。召二府條對。仲淹惶恐退而上十事。一曰明黜陟。二曰抑僥倖。三曰精貢舉。四曰擇長官。五曰均公田。六曰厚農桑。七曰脩武備。

八曰推恩信。九曰重命令。十曰減徭役。帝方信嚮仲淹。悉采用之。

張方平。慶曆元年。西方用兵已六年矣。仁宗既厭兵而賊亦困弊。方平慨然上疏曰。陛下猶天地父母也。豈與此犬豕豺狼較勝負乎。願因今歲郊赦。引咎示信。開其自新之路。申勅邊吏。勿絕其善意。若猶不悛。亦足以怒我而怠彼。雖天地鬼神必將誅之。帝喜曰。是吾心也。命以疏付中書。呂夷簡讀之。拱手曰。公

之言及此。是社稷之福也。是歲赦書開諭如  
方平意。明年二月元昊請降。方平又建言國  
家都陳留。當四通五達之道。非若雍洛有山  
川足恃。特倚重兵以立國耳。兵恃食。食恃漕  
運。以汴為主。汴帶引淮江。利盡南海。天聖已  
前。歲調民浚之。故水行地中。其後浚晏者。爭  
以裁減役費為功。汴日以塞。今仰而望焉。是  
利尺寸而喪丘山也。乃畫上十四策。富弼讀  
其奏。漏盡十刻。帝稱善。弼曰。此國計大本。非

常奏也。悉如其說行之。遷尚書左丞。

范鎮。仁宗時知諫院。上疏論民田困弊。請約祖宗以來官吏兵數。酌取其中為定制。以今賦入之數十七為經費。儲其三以備水旱非常。又言周以冢宰制國用。唐以宰相判鹽鐵度支。今中書主民。樞密主兵。三司主財。各不相知。財已匱。樞密益兵無窮。民已困。三司取財不已。請使二府通知兵民大計。與三司同制國用。又言備契丹莫若寬晉民。備靈夏莫

若寬秦民。備西南。莫若寬蜀民。備天下。莫若寬天下之民。夫兵所以衛民而反殘民。臣恐異日之憂。不在四夷而在冗兵與窮民也。

傳堯俞嘉祐末為監察御史。時乏國用。言利者爭獻富國計。堯俞奏曰。今度支歲用不足。誠不可忽。然欲救其弊。陛下宜自儉。刻身先天下。無奪農時。勿害商旅。如是則可矣。不然。徒欲紛更。為之無益。聚斂者用。則天下殆矣。歐陽脩同脩起居注。知制誥。奉使河東。自西

方用兵。議者欲廢麟州以省餽餉。脩曰。麟州  
天險不可廢。廢則河內郡縣民皆不安居矣。  
不若分其兵並駐河內諸堡。緩急得以應援。  
而平時可省轉輸。於策為便。由是州得不廢。  
又言忻代岢嵐多禁地。廢田。願令民得耕之。  
不然將為敵有。朝廷行其議。歲得粟十萬斛。  
凡河東賦歛過重。民所不堪者。悉奏罷之。  
呂公弼。神宗時進樞密使。議者欲併環慶鄜  
延為一路。公弼曰。自白草西抵定遠。中間相

去千里。若合為一路。猝有緩急。將何以應。欲下邊臣使議之。公弼曰。廟堂之上。不處決。而委邊吏。可乎。乃止。陳升之建議。衛兵年四十以上。稍不中程者。減其牢廩。徙之淮南。公弼以為非人情。帝曰。是當退為剩員者。今故為優假。何所害。公弼曰。臣不敢生事邀名。正恐誤國耳。既使去本土。又削其廩。儻衆皆相聚反側。為之奈何。韓絳議復肉刑。公弼力陳不可。帝皆為之止。



王熾叟。哲宗時拜樞密直學士。簽書院事。奏  
曰。陛下今日聖學。當深辨邪正。正人在朝。則  
朝廷安。邪人一進。便有不安之象。非謂一夫能  
然。蓋其類應之者衆。上下蔽蒙。不覺養成禍  
爾。又曰。或聞有以君子小人參用之說告陛  
下者。不知果有之否。此乃深誤陛下也。自古  
君子小人無參用之理。聖人但云君子在內。  
小人在外。則泰。小人在內。君子在外。則否。小  
人既進。君子必引類而去。若君子小人競進。

則危亡之始也。此際不可不察。帝深然之。  
葉夢得為戶部尚書。高宗駐蹕揚州。夢得陳  
待敵之計有三。曰形。曰勢。曰氣而已。形以地  
理山川為本。勢以城池芻粟器械為重。氣以  
將帥士卒為急。形固則可恃。以守。勢強則可  
資以立。氣振則可作以用。如是則敵皆在吾  
度內矣。因請帝南巡。阻江為險。以備不虞。  
胡銓紹興間為國史院編脩官。請都建康。大  
槩謂與人鬪。不搯其亢而拊其背。不能全勝。

今日大勢自淮以北天下之亢與背也而建康則搯之拊之之地也若據建康下臨中原此高光興王之計也顧都之

汪應辰為秘書省正字時秦檜力主和議王倫使還金人欲以河南地歸宋應辰上疏謂和議不諧非所患和議諧矣而因循無備之可畏異議不息非所患異議息矣而上下相蒙之可畏今雖通和疆場之上宜各戒嚴以備他盜今方且肆赦中外褒寵將帥以為休

兵息民自此而始。縱忘積年之恥。獨不思異時意外之患乎。此因循無備之所以可畏也。方朝廷力排羣議之初。大則竄逐。小則罷黜。至有一言迎合。則不次擢用。是以小人窺見間隙。輕躁者阿諛以希寵。畏懦者循默以備位。而忠臣正士乃無以自立於羣小之間。此上下相蒙之所以可畏也。臣願勿以和好之可無虞。而思患預防。常若敵人之至可也。趙葵淳祐間累官至同知樞密院事。疏奏今

天下之事其大者有幾天下之才其可用者有幾須從其大者而講明之疏其可用者而任使之有勇畧者治兵有心計者治財寬厚者任牧養剛正者持風憲為官擇人不為人擇官用之既當任之宜久然後可以責其成效乞詔大臣講求規畫凡有關於宗社安危治亂之大計者條具以聞審其先後緩急而籌策之則治功可成外患不足畏矣理宗嘉納之

元耶律楚材金貞祐二年為行中書省左右司  
員外郎留守燕。元太祖定燕。聞其名召見之。  
楚材身長八尺。美髯宏聲。帝偉之。夏人常八  
斤以善造弓見知於帝。每自矜曰。國家方用  
武。耶律儒者何用。楚材曰。治弓尚須用弓匠。  
治天下者豈可不用治天下匠耶。帝聞之甚  
喜。日見親用。及議籍中原民。大臣忽都虎等  
議以丁為戶。楚材曰。不可。丁逃則賦無所出。  
當以戶定之。爭之再三。卒以戶定。時將相大

臣有所驅獲。往往寄留諸郡。楚材因括戶口。並令為民匿。占者死。太宗時有于元者。奏行交鈔。楚材曰。金章宗時初行交鈔。與錢通行。有司以出鈔為利。收鈔為諱。謂之老鈔。至以萬貫唯易一餅。民力困竭。國用匱乏。當為鑒戒。今造交鈔。宜不過萬錠。從之。

劉秉忠初事世祖。藩邸為書記。即見親任。密謀大計。莫不預焉。及即位。拜光祿大夫太保。叅領中書省事。嘗命擬議治天下之大經。養

民之良法。秉忠條上祖宗舊典。參以古制之  
宜於今者。帝善之。命下之日。網舉目張。一時  
人才咸見錄用。文物粲然一新。

姚樞為中書左丞。言於世祖曰。陛下於基業  
為守成。於治道為創始。正宜睦親族以固本。  
建儲副以重祚。定大臣以當國。開經筵以格  
心。脩邊備以防虞。蓄糧餉以待歉。立學校以  
育才。勸農桑以厚生。帝納之。

史惟良言於文宗曰。今天下郡邑被害者衆。



國家經費若此之繁。帑藏空虛。生民凋瘵。此正更新百廢之時。宜遵世祖成憲。汰冗濫。蠶食之人。罷土木不急之役。事有不便者。咸釐正之。如此。則天灾可弭。禎祥可致。不然。將恐因循苟且。其弊彌深。治亂之由。自此而分矣。帝嘉納之。